

दिनांक 02.08.2025
 समय: 18.45 बजे
 आकाशवाणी जयपुर-अजमेर
 प्रादेशिक समाचार

- प्रधानमंत्री नरेन्द्र मोदी पी.एम. किसान सम्मान निधि की 20 वीं क़ेशत जारी कीनी- कह्यो - पी.एम. धन-धान्य योजना रा तैत 24 हज़ार करोड़ रुपया खर्च क़र्या जावेला ।
- मुख्यमंत्री भजन लाल शर्मा कह्यो- सरकार किसानां ने पाणी-बिजली की ज़रूरी पूर्ति माथे खास ध्यान दे रही है ।
- विधानसभा मांय युवा संसद राख्यी ज्यी-13 राज्यां अर केन्द्र रा राज वाळा प्रदेशां रा नौजवान शिरकत कीनी ।
- राज्य मांय हाल ताई व्ही बिरखा ऊं 260 बंधा लबालब व्ह्या ।

प्रधानमंत्री नरेन्द्र मोदी आज पीएम किसान सम्मान निधि की 20वीं क़िस्त जारी कीनी । श्री मोदी उत्तर प्रदेश मांय वाराणसी ऊं आखा देश रा 9 करोड़ 70 लाख ऊं बत्ता किसानां रा खातां मांय 20 हज़ार 500 करोड़ रुपया की रकम भेजी । प्रधानमंत्री करीब 22 सौ करोड़ रुपया रा खर्च वाळी 52 विकास परियोजनावां रा काम की नींव रखी । ई मौके वे कह्यो के लारला दस साल मांय सरकार किसानां की हर परेशानी दूर करण सारु पूरी कोशिश कीनी । श्री मोदी बतायो के किसानां सारु पीएम धन धान्य योजना ई चलायी जावेला, जिण रा तैत 24 हज़ार करोड़ रुपया खर्च क़र्या जावेला ।

प्रदेश रा 75 लाख किसानां रा खातां मांय ई पीएम किसान सम्मान निधि र तैत करीब 1 हज़ार 600 करोड़ रुपया भेजी ज्यो । मुख्यमंत्री भजन लाल शर्मा बांसवाड़ा मांय राख्यी ज्यो राज्य स्तर रा जळसा मांय कह्यो के सरकार किसानां सागे है अर वां की बेहतरी सारु काम कर रही है । श्री शर्मा कह्यो के किसान अन्नदाता है जो आवता बगत मांय ऊर्जादाता ई बणेला । वे कह्यो के राज्य रा 22 जिलां मांय किसानां ने दिन मांय ई बिजली मिल रही है ।

मुख्यमंत्री ई मौके पीएम आवास योजना रो फ़ायदो लेवण वाळां ने मकानां री चाबियां ई संपी। श्री शर्मा बांसवाड़ा मांय बांशिया भील स्मारक बणावण, मक्का प्रोसेसिंग यूनिट अर कालीबाई संग्रहालय बणावण रो ई ऐलाण कीनो। पीएम किसान सम्मान निधि री रकम किसानां रा खातां मांय भेजण रा कार्यक्रम ने प्रदेश रा सगळा जिलां मांय पीएम-किसान उत्सव दिवस रा तौर ऊं मणायी ज्यो। ई कार्यक्रम रा राष्ट्रीय अर राज्य स्तर रा जळसा रो सीधो प्रसारण करी ज्यो। किसान सम्मान निधि री रकम मिल्यां पाछे किसानां मांय उमाव निजर आयो। अजमेर जिला रा काश्तकार ई सारु सरकार रो आभार जतायो।

सवाईमाधोपुर रा किसान ई ई मौके खास आभार जतायो।

लोकसभा अध्यक्ष ओम बिरला भारतीय रेल ने अनुशासन अर समर्पण रो दूजो नाम बतायो है। वे आज कोटा मांय रेलवे रा जनसम्पर्क विभाग री ओर ऊं राख्यी ज्यी अखिल भारतीय जनसम्पर्क सेमीनार मांय बोल रह्या हा। वे कह्यो के रेल परिचालन तंत्र मांय रेलवे जनसम्पर्क कर्मचारियां रो खास काम व्हे है। श्री बिरला कह्यो के रेल मांय सफ़र ने और बेहतर अर सुरक्षित बणावण सारु केई कोशिशें करी ज्यी है। खबरनवीसां सागे बातचीत करता थकां लोकसभा अध्यक्ष कह्यो के रेलवे जनसम्पर्क विभाग री मांगां, समस्यावां अर चुनौतियां री जाणकारी रेलमंत्री ताई पूगायी जावेला।

केन्द्रीय कानून मंत्री अर्जुनराम मेघवाल आर्टिफिशियल इन्टेलीजेंस-ए.आई. ने जिम्मेदारी सागे इस्तेमाल करण माथे जोर दीनो है। श्री मेघवाल आज आईआईटी जोधपुर रा स्थापना दिवस समारोह मांय बोल रह्या हा। वे कह्यो के तकनीक रे मार्फत केई नवाचार कर्या जा रह्या है पण वां ने सही तरीका ऊं काम लिया जावणा चाहिजे। श्री मेघवाल विद्यार्थियां ऊं राष्ट्रीय चुनौतियां रो हल खोजबा सारु आगे बध र काम करण बाबत् ई कह्यो।

चुनाव आयोग बूथ लेवल रा अहलकारां -बीएलओ रो मेहनतानो दोगुणो कर दीनो है। वोटर लिस्टां बणावण अर पुनरीक्षण रा काम मांय शामिल बीएलओ सुपरवाइजरां रो मानदेय ई बधा दियो ज्यो है। आयोग रे मुजब बीएलओ रो सालाना मेहनतानो छह हजार रुपया ऊं बधा र बारह हजार रुपया कर दियो ज्यो है। ई सागे ई मतदाता सूची पुनरीक्षण रा काम सारु बीएलओ ने दी जावण वाळी प्रोत्साहन राशि ई एक हजार रुपया ऊं बधा र दो हजार रुपया कर दीरीजी है।

वोटर लिस्टां बणावण री देखरेख मांय खास काम करण वाळा बीएलओ सुपरवाइजरां ने अब बारह हजार रुपया री बजाय अठारह हजार रुपया सालाना दिया जावेला। चुनाव आयोग पहली दफा ईआरओ अर ईआरओ ने ई मानदेय मानदेय रा तौर ऊं 25 हजार अर 30 हजार रुपया दिया जावेला।

सिरोही मांय नीति आयोग रा सम्पूर्णता अभियान अर आकांक्षी जिला कार्यक्रम रा तैत आज आकांक्षा हाट लगायी ज्यी। सांसद लुम्बाराम चौधरी अर मंत्री ओटाराम देवासी इण रो उद्घाटन कीनो। हाट मांय वठे रा महिला स्वयं सहायता समूहां री ओर ऊं दुकानां लगायी ज्यी है, जठे हाथ री कारीगरी ऊं बण्या सामान अर खाण-पीण री सामग्री समेत केई भांत रा सामान बेचा जा रह्या है।

विधानसभा मांय आज युवा संसद राख्यी ज्यी। विधानसभा अध्यक्ष वासुदेव देवनानी इण रो उद्घाटन कीनो। ई मौके श्री देवनानी कह्यो के ओ आयोजन विद्यार्थियां ने अगुवाई करण, बात कहवण अर फैसला करण री प्रक्रिया मांय शामिल व्हेवण रो मौको देवे है। वे कह्यो के इण ऊं नौजवानां ने लोकतंत्र मांय भागीदारी करण री सीख मिले है।

राष्ट्रमण्डल संसदीय संघ री राजस्थान शाखा री ओर ऊं राख्यी ज्या ई कार्यक्रम मांय 13 राज्यां अर केन्द्र रा राज वाळा प्रदेशां रा 168 नौजवान शामिल व्ह्या। ई दौरान अ नौजवान राष्ट्रीय अर अन्तर्राष्ट्रीय स्तर रा न्यारा न्यारा मुद्दां माथे विचार जताया।

अलवर मांय पांच अगस्त ऊं सेना भर्ती रैली सरू व्हेला। 20 अगस्त तांई चालण वाळी ई रैली मांय अलवर, खैरथल-तिजारा, भरतपुर, डीग, धौलपुर अर कोटपूतली-बहरोड़ जिला रा मोट्यार शामिल व्हे सकेला। जनसम्पर्क अधिकारी लेफ्टिनेंट कर्नल निखिल धवन बतायो के रैली मांय चुण्या जावण वाळा उम्मीदवार अग्निवीर री न्यारी-न्यारी श्रेणियां मांय भर्ती कर्या जावेला।

मुख्यमंत्री भजन लाल शर्मा आज सलूमबर ज़िला रा धौलागढ़धाम मांय श्रावण महाकुम्भ महोत्सव मांय जातरुआं ने सम्बोधित कीना। ई मौके वे कह्यो के सरकार तीर्थ विकास अर धार्मिक पर्यटन ने बधावो देवण सारु लगातार कोशिश कर रही है।

मौसम विभाग आज अलवर, करौली, भरतपुर, दौसा अर धौलपुर मांय तेज़ बिरखा व्हेवण सारु चेतायो है, जद के भरतपुर अर जयपुर संभाग रा कुछ हलकां मांय काल ऊं बिरखा मांय ओजू बधोतरी व्हेवण रा आसार है। मौसम केन्द्र जयपुर रा निदेशक राधेश्याम शर्मा बतायो के 4 अगस्त ने भरतपुर संभाग अर आरे-सारे रा हलकां मांय कठे-कठे घणी जोरदार बिरखा व्हे सके है, जद के जोधपुर अर बीकानेर संभाग रा घणखर हलकां मांय आवता एक सप्ताह ताई बिरखा रो ज़ोर कम रहवण री संभावना है।

ई बीचे लारला चौबीस घंटां मांय सब ऊं बत्ती 16 सेंटीमीटर बिरखा श्रीगंगानगर मांय व्ही। हनुमानगढ़ ज़िला रा गोलूवाला मांय ई 15 सेंटीमीटर ऊं बत्तो पाणी बरस्यो। भरतपुर, कोटा, सीकर, डूंगरपुर, भीलवाड़ा अर सिरोही मांय ई 2 ऊं 5 सेंटीमीटर ताई मेह व्ह्यो। राज्य मांय एक जून ऊं एक अगस्त ताई 403 मिलीमीटर बारिश व्ही है जो पूरा चौमासा मांय व्हेवण वाळी बिरखा रो करीब 94 फीसदी है। प्रदेश मांय व्हे रही चौखी बिरखा ऊं बंधां ई तीन चौथाई ऊं बत्ता भर गया है। 693 मांय ऊं 260 बंधा पूरा भर गया है। ई बीचे लगातार बरस रह्या पाणी ने ध्यान राखता थकां जयपुर मांय बणायी ज्यो केन्द्रीय बाढ़ नियंत्रण कक्ष चौकस है अर भारी बारिश वाळा ज़िलां रा हालात माथे लगातार निजर राख रह्यो है।
